

Inunnik ikiorsiisarneq pillungu Inatsisartut oqallinnissaannik siunnersuut.

(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Naalakkersuisut siunnersuut inunnik ikiorsiisarnerit pillugit ajornartorsiutinut imaannaanngitsunut tunngasoq qujassutigaa.

Naalakkersuisuniit aallaqqaasiullugu oqaatigissavarput soorunalimi pissusissamisoorsinnaanngimmat suliffissuit sulisussaaleqinermik pissuteqartumik matoqqasariaqartarnerat, naak nunatsinni suliffeqanngitsut amerliartoraluartut. Naalakkersuisuni isumaqarpugut nukissat nunatsinniittut sapinngisamik pitsaanerpaamik isumatusaarluta iluaqutigissagivut.

Inunnut suliffissaaleqinermik eqqugaasimasunut pisortaniillu ikiorsiissutinik pisartunut tunngatillugu matumani eqqaamaneqassaaq inuttut ataasiakkaarlutik innuttaasut ataasiakkaat aallaavigalugit siunnersorneqarsinnaatitaallutillu ilitsersorneqarsinnaatitaammata siunertaralugu ataavartumik suliffeqalersinnaanerat.

Kommunip pissusaaffigaa pisortat ikiorsiissutaannik pisartagalimmut oqaatigissallugu inummut iliuusissanik pilersaarummik suliaqartoqarnissaa pinsinnaatitaaffiummat. Taamaalilluni kommunip utaqeqqaassanngilaa pisortanit ikiorsiissutinik pisartagalip nammineerluni iliuusissatut pilersaarummik qinnuteqarnissaa, pissusaaffigaluguli pisartagalip inummut namminermut iliuusissatut pilersaarusiordfigineqarsinnaanera ilisimatitsissutigissallugu.

Inummut namminermut iliuusissatut pilersaarusiornikkut siunertaavoq pisartagalip suliffeqalernissaanut suliffeqaannarnissaanullu inuttullu aamma ilaqutariittut inuuniarnerminik pitsaanerulersitsinnaaneranut tunngatillugu siunnerfilimmik sulissunneqarnerata qulakkeerneqarnissaa.

Iliuusissatut pilersaarut taamaalilluni pisartagalip siunissamit pitsaanerpaanik atugaqalernissaata qanoq ililluni qulakkeerneqarnissaanut najoqqutassat atorneqassaaq, suliffeqarnermut utertera imaluunniit allatut pisortanit pilersugaalernerapeqqutaatinnagu. Iliuusissatut pilersaarut imatut ilusiligaassaaq pisartagalip kommunillu nalornissutigissanagu ingerlariaqqiffik tulleg suussanersoq. Iliuusissatut pilersaarutip erseqqissunik paatsuugassaannngitsunillu oqaasertalersorneratigut pisortanit ikiorsiissutinik pisartagalik kommunalbestyrelsilu pineqartumut tunngatillugu anguniagaasunut aalajangiusimatinniarneqassapput.

Pisortat ikiorsiissarneratigut siunertaanngilaaq innuttaasut ataavartumik pilersuinnermut tunngavissatut taamatut ikiorneqartarnissaat.

Pisortanit ikiorneqarnissamik qinnuteqaraanni imaluunniit pisortat ikorsiiissutaannik pisartagaqaraanni sulisussarsiarineqarsinnaaneq pissusaaffiuvoq. Inuup suliffissaminik naammaginarumik neqeroorfigitittup suliffissaq akuersaassavaa, tassa pineqartoq

sulisinnaangitsutut, napparsimasutut imaluunniit erninermut atatillugu sulinngiffeqartussatut nalilerneqanngippat.

Taamaalilluni aallaaviussaaq peqqikkaanni ajoquteqaranilu kommunimit suliffissaq innersuussutigineqartoq naaggaarneqarsinnaanngilaq apeqqutaatinnagu taanna pineqartup suliarisartagaanut, ilinniagarisimasaanut assigisaannullu tunngatillugu suliarisartagaasa avataanniinnersoq.

Kommunalbestyrelsittaaq naliliivigissavaa neqeroorutigineqartoq naapertuuttuunersoq. Naliliineq inummut naliliineruvoq, tassani sianiginiarneqassalluni qanoq annertutigisumik pineqartup suliffissaq innersuussutigineqartoq artunnginneraa.

Siunnersuuteqartup apeqqutigaa inuit peqqissut ajoquteqanngitsullu aasaanerani suliffissuarni matusariaqalersuni suliumanngitsut ikiorsiissutinik pisartagaqaannarsinnaanersut.

Soorunalimi Naalackersuisuni isumaqarpugut, pisortanit ikiorsiisarneq pillugu inatsisit malinneqassasut. Pisortat ikiorsiissutaannik pisartagaqarsinnaassagaanni tamakku pillugit inatsisini aalajangersakkat naammassineqarsimassapput. Taamaammat suliffeqanngitsutut nalunaarutigigaanni suliffissarsiortuullunilu soorunalimi suliffissamik neqeroorutigineqartut akuerineqartussaapput. Tamatumunnga naaggaartoq aallaavittut pisortanit ikiorserneqarsinnaanngilaq.

Suliffissamik neqeroorutigineqartoq siusinnerusukkut suliarisarsimasanit allaaneruppat suliffeqanngitsoq pinngitsoorani inuttut siunnersorneqarnissamik ilitserorneqarnissamillu atorfissaqartitsissaaq pingaartumik sivisuumik suliffeqarsimanngikkuni.

2025-mut pilersaarummi ersippoq, Naalackersuisut sukumiisumik iluarsartuusseqinnissaq piareersaraat. Ineqarnermut akileraartarnermullu politikki ilaatillugu atugarissaarnissamut politikki aaqqissuunneqassaaq, sulinissaq tamatigut imminut akilersinnaanngorlugu.

Naalackersuisuniit taamatut oqaaseqarluta oqallilluartoqarnissaa qilanaaraarput.